

naqueles lugares do territorio nacional que estableza o Goberno.

As indemnizacións por residencia foron actualizándose nos últimos anos de maneira anual, a través da súa subida polas leis de orzamentos de cada ano cos incrementos retributivos correspondentes e con carácter excepcional a través de subidas puntuais que afectan as indemnizacións dun ou doutro territorio.

A última modificación nesta materia levouse a cabo tras a habilitación legal incluída na disposición adicional décimo segunda da Lei 62/2003, do 30 de decembro, de medidas fiscais, administrativas e da orde social.

Tendo en conta as especiais circunstancias que concorren na Comunidade Autónoma das Illes Balears e nas cidades de Ceuta e Melilla, faise necesario adoptar medidas que permitan por parte da Administración do Estado favorecer a permanencia dos empregados públicos nos territorios en que se detectou unha maior dificultade para a cobertura de vacantes, de tal forma que coa actualización destas contías se consiga manter un maior grao de ocupación dos postos de traballo, ademais de compensar mellor a distancia dos citados territorios.

Á vista do exposto, existen razóns de urxencia que xustifican a necesidade de aprobar un real decreto lei como habilitación legal imprescindible para que o Goberno poida abordar, de forma inmediata, a actualización das contías que en concepto de indemnización por residencia perciben os empregados de sector público estatal destinados na Comunidade Autónoma das Illes Balears e nas cidades de Ceuta e Melilla.

Na súa virtude, facendo uso da autorización contida no artigo 86 da Constitución, por proposta dos ministros de Economía e Facenda e de Administracións Públicas e logo de deliberación do Consello de Ministros na súa reunión do día 29 de decembro de 2006,

#### DISPÓN O:

Artigo primeiro. *Indemnizacións por residencia na Comunidade Autónoma das Illes Balears e nas cidades de Ceuta e Melilla.*

O Goberno revisará no ano 2007 as indemnizacións por residencia do persoal en activo do sector público estatal destinado na Comunidade Autónoma das Illes Balears e nas cidades de Ceuta e Melilla, e procederá a modificar as contías con obxecto de adaptalas á realidade actual. Esta actualización non poderá supoñer, en ningún caso, unha minoración das cantidades actualmente percibidas neste concepto, nin un custo anual superior a 500.000 euros para a Comunidade Autónoma das Illes Balears e de 4.500.000 euros para as cidades de Ceuta e Melilla.

Artigo segundo. *Distribución das indemnizacións por residencia.*

A distribución das contías entre os distintos grupos efectuarase na Mesa Xeral de Negociación da Administración Xeral do Estado, recollida no punto 2 da disposición adicional sexta da Lei 9/1987, do 12 de xuño, modificada pola Lei 21/2006, do 20 de xuño.

Disposición derradeira primeira. *Desenvolvemento regulamentario.*

Autorízase o Goberno para ditar cantas disposicións sexan necesarias para o desenvolvemento e a execución deste real decreto lei.

Disposición derradeira segunda. *Entrada en vigor.*

Este real decreto lei entrará en vigor o día seguinte ao da súa publicación no «Boletín Oficial del Estado».

Dado en Madrid o 29 de decembro de 2006.

JUAN CARLOS R.

O presidente do Goberno,  
JOSÉ LUIS RODRÍGUEZ ZAPATERO

**22952** REAL DECRETO LEI 12/2006, do 29 de decembro, polo que se modifican a Lei 19/1994, do 6 de xullo, de modificación do réxime económico e fiscal de Canarias, e o Real decreto lei 2/2000, do 23 de xuño. («BOE» 312, do 30-12-2006.)

I

A Lei 19/1994, do 6 de xullo, de modificación do réxime económico e fiscal de Canarias, contén no seu articulado a regulación de diversos incentivos fiscais, aplicables tanto á imposición directa como á indirecta. De acordo co dereito comunitario, algunhas destas previsións teñen a consideración de axudas de Estado. Para a súa eficacia, é imperativo notificar a súa introdución ou modificación co obxecto de que a Comisión Europea valore a súa compatibilidade co Tratado constitutivo da Comunidade Europea.

Xa que a Comisión Europea outorgou con data do 20 de decembro de 2006 cadansúa autorización, con números de referencia N 377/2006 e N 376/2006, relativas, respectivamente, aos incentivos fiscais xerais do réxime económico e fiscal de Canarias dos artigos 25, 26 e 27 e do réxime da Zona Especial Canaria, contidos na dita lei, para a súa renovación a partir do próximo 1 de xaneiro de 2007, é necesario promulgar antes de que finalice o exercicio 2006 as pertinentes modificacións ao articulado da citada lei. Estas autorizacións teñen vixencia para o período 2007-2013 e o seu desenvolvemento débese axustar ás directrices sobre as axudas de Estado de finalidade rexional e ao mapa de axudas estatais de finalidade rexional aprobado para España para este mesmo período co número N 626/2006, con data do 20 de decembro de 2006.

Este real decreto lei contén unha modificación detallada dos artigos 25 e 27, que regulan, respectivamente, os incentivos ao investimento e a reserva para investimentos en Canarias, incluídos no título IV da Lei 19/1994, relativo ás medidas complementarias de promoción do desenvolvemento económico e social de Canarias, e de varios dos artigos do título V, en que se regula a Zona Especial Canaria; todo iso, como consecuencia de que este conxunto de beneficios fiscais debe ser adaptado ás decisións da Comisión Europea, ditadas pola súa vez baixo as prescricións das novas directrices sobre as axudas de Estado de finalidade rexional para o período 2007-2013.

Logo dunha nova redacción, as exencións polo imposto sobre transmisións patrimoniais e actos xurídicos documentados e o imposto xeral indirecto canario previstas no referido artigo 25 serán de aplicación en relación cos investimentos en activos, tanto materiais como inmateriais, que sexan destinados ou formen parte dun investimento inicial, tal e como a definen as citadas directrices: na creación ou ampliación dun establecemento, a diversificación da súa actividade para a elaboración de novos produtos ou a transformación substancial no seu proceso xeral de produción.

O artigo 27 da citada lei regula as reducións fiscais pola dotación da reserva para investimentos en Canarias. O seu texto adáptase aos novos conceptos comunitarios. Incorporárase a posibilidade de que o aforro fiscal se canalice cara á creación de emprego e admítase a posibilidade de que a reserva para investimentos en Canarias se poida materializar na subscrición de accións ou participacións emitidas polas entidades da Zona Especial Canaria. Establécense regras máis precisas dirixidas a ofrecer maior seguraza xurídica e a garantir que o destino dos investimentos sexan as illas do arquipélago. Tamén se reforzan os mecanismos de control da aplicación destas vantaxes fiscais, entre os que destacan a obriga de presentar un plan de investimentos, a inclusión de determinada información relevante para estes efectos na memoria das contas anuais e o establecemento dun réxime sancionador específico.

Por outra parte, prodúcense cambios importantes encamiñados a restrinxir todos estes beneficios tributarios respecto do solo e as actividades inmobiliarias. O obxectivo primordial é reorientar, na medida do posible, os investimentos empresariais produtivos cara a sectores da economía menos intensivos no consumo de solo. Non obstante, o seu desfrute manterase respecto dos investimentos en terreos afectos á promoción de vivendas protexidas en Canarias, ao desenvolvemento de actividades industriais, a determinadas actividades turísticas e cando a súa adquisición teña por obxecto a rehabilitación dun establecemento turístico situado nunha área cuxa oferta turística se encontre en declive, segundo os termos en que se define nas directrices de ordenación xeral de Canarias, aprobadas pola Lei 19/2003, do 14 de abril.

Pola súa banda, o artigo 26 da Lei 19/1994, relativo ao réxime especial das empresas produtoras de bens corporais, só foi modificado para introducir algunha corrección de técnica tributaria, dado que dos estudos efectuados e da experiencia adquirida confíase en que siga sendo un claro elemento dinamizador da economía industrial das illas canarias.

En relación co réxime da Zona Especial Canaria, introducíronse diversas modificacións para mellorar a súa configuración, co fin de conseguir que se alcancen os seus obxectivos primordiais: o desenvolvemento económico e social e a diversificación da economía das illas Canarias nas mellores condicións posibles. Das mencionadas modificacións debemos destacar a ampliación do seu prazo de vixencia, que alcanzará ata o 31 de decembro de 2019, ben que as entidades da Zona Especial Canaria só se poderán inscribir no seu rexistro oficial ata o 31 de decembro de 2013; a redución significativa dos requisitos de emprego e investimento con respecto ás entidades que se instalen nas illas non capitalinas do arquipélago: El Hierro, Fuerteventura, La Gomera, Lanzarote e La Palma; a simplificación dos tipos impositivos do imposto sobre sociedades aplicables ás entidades da Zona Especial Canaria, queda establecido un tipo impositivo único do 4%, e a incorporación de novas actividades permitidas tales como o mantemento aeronáutico ou a xeración de enerxías renovables, para cuxo fin se modifica o anexo do Real decreto lei 2/2000, do 23 de xuño, polo que se modifica a Lei 19/1994, do 6 de xullo, de modificación do réxime económico e fiscal de Canarias, e outras normas tributarias. Ademais, como se sinalou anteriormente, admítase a subscrición de accións ou participacións emitidas polas entidades da Zona Especial Canaria como instrumento para materializar a reserva para investimentos en Canarias.

## II

Á vista das modificacións recollidas neste real decreto lei, derivadas da concesión comunitaria de novas autorizacións, e dada a expiración das vixentes ao final deste

exercicio, é de vital importancia que o marco regulador descrito entre en vigor antes de que se inicie o ano 2007, para que os axentes económicos poidan coñecer o marco xurídico-tributario aplicable ás actividades e investimentos producidos en Canarias e planificar as súas decisións tendo en conta o novo contexto fiscal que se encontrará en vigor a partir da dita data.

As circunstancias descritas xustifican sobradamente o recurso á figura xurídica do real decreto lei, ao concorrer o suposto habilitante da extraordinaria e urxente necesidade que a nosa Constitución exige para a súa utilización.

Na súa virtude, facendo uso da autorización contida no artigo 86.1 da Constitución española, por proposta do vicepresidente segundo do Goberno e ministro de Economía e Facenda e logo de deliberación do Consello de Ministros na súa reunión do día 29 de decembro de 2006,

## DISPONGO:

**Artigo primeiro.** *Modificación da Lei 19/1994, do 6 de xullo, de modificación do réxime económico e fiscal de Canarias.*

A Lei 19/1994, do 6 de xullo, de modificación do réxime económico e fiscal de Canarias, queda modificada como segue:

Un. Con efectos a partir do 1 de xaneiro de 2007, modifícase o artigo 25, que queda redactado do xeito seguinte:

«Artigo 25. *Incentivos ao investimento.*

1. As entidades suxeitas ao imposto sobre sociedades con domicilio fiscal en Canarias e as que actúen en Canarias mediante establecemento permanente están exentas do imposto sobre transmisións patrimoniais e actos xurídicos documentados cando o rendemento deste imposto se considere producido en Canarias:

a) Na modalidade de transmisións patrimoniais onerosas, pola adquisición de bens de investimento e dos elementos do inmovilizado inmaterial a que se refire a letra b) do número 3 deste artigo.

Tratándose da adquisición de elementos do inmovilizado inmaterial, a exención limitarase ao cincuenta por cento do seu valor, salvo que o adquirente cumpra as condicións do artigo 108 do texto refundido da Lei do imposto sobre sociedades, aprobado polo Real decreto legislativo 4/2004, do 5 de marzo.

b) Na modalidade de operacións societarias, pola constitución de sociedades e pola ampliación de capital pola súa parte que se destine á adquisición ou importación de bens de investimento ou á adquisición ou cesión de elementos do inmovilizado inmaterial a que se refire a letra b) do número 3 deste artigo. Tratándose de achegas non en diñeiro, estas deben ter a consideración de ben de investimento ou tratarse dos elementos do inmovilizado inmaterial citados.

En ningún caso se encontra exenta a ampliación de capital por compensación de créditos.

2. As entidades suxeitas ao imposto sobre sociedades con domicilio fiscal en Canarias e as que actúen en Canarias mediante establecemento permanente, que non teñan dereito á dedución total das cotas soportadas do imposto xeral Indirecto canario, están exentas deste imposto:

a) Nas entregas e importacións de bens de investimento, cando as citadas entidades sexan adquirentes ou importadoras de tales bens.

b) Nas prestacións de servizos de cesión de elementos do inmovilizado inmaterial, a que se refire a letra b) do número 3 deste artigo, cando as citadas entidades actúen como cesionarias. Neste caso, a exención limitarase ao cincuenta por cento do seu valor, salvo que se trate de cesionarios que cumpran as condicións do artigo 108 do texto refundido da Lei do imposto sobre sociedades.

Enténdese que a entidade adquirente, importadora ou cesionaria non ten dereito á dedución total cando a porcentaxe de dedución provisionalmente aplicable no ano de realización da entrega ou importación do ben de investimento ou da prestación de servizos de cesión de elementos do inmovilizado inmaterial é inferior ao cen por cento, incluso no suposto de pagamentos anticipados.

Para os efectos deste punto, asimílanse ás entregas de bens de investimento as execucións de obra que teñan a condición de prestacións de servizos e que teñan como resultado un ben de investimento para a entidade adquirente.

Os suxeitos pasivos do imposto xeral indirecto canario que entreguen os bens de investimento ou presten o servizo de cesión de elementos do inmovilizado inmaterial, exentos por aplicación do disposto neste punto, terán dereito a deducir as cotas do imposto soportadas na adquisición ou importación de bens ou servizos que se utilicen na realización de tales entregas de bens ou prestacións de servizos, salvo que á dita entrega ou prestación de servizos lle sexa de aplicación outra exención do imposto que non xere dereito para deducir.

3. Para os efectos do establecido neste artigo:

a) Terán a consideración de bens de investimento os elementos patrimoniais do inmovilizado material adquiridos ou importados con ocasión dun investimento inicial. Enténdese por investimento inicial aquel que ten por obxecto:

A creación dun establecemento.

A ampliación dun establecemento.

A diversificación da actividade dun establecemento para a elaboración de novos produtos.

A transformación substancial no proceso xeral de produción dun establecemento.

No caso da adquisición de solo, edificado ou non, adicionalmente será necesario que este non se beneficiase anteriormente do réxime previsto neste artigo e se afecte:

Á promoción de vivendas protexidas, cando proceda esta cualificación de acordo co previsto no Decreto 27/2006, do 7 de marzo, polo cal se regulan as actuacións do Plan de Vivenda de Canarias, destinadas ao arrendamento pola entidade promotora.

Ao desenvolvemento de actividades industriais incluídas nas divisións 1 á 4 da sección primeira das tarifas do imposto sobre actividades económicas, aprobadas polo Real decreto legislativo 1175/1990, do 28 de setembro, polo que se aproban as tarifas e a instrución do imposto sobre actividades económicas.

As zonas comerciais, e ás actividades turísticas reguladas na Lei 7/1995, do 6 de abril, de ordenación do turismo de Canarias, cuxa adquisición teña por obxecto a rehabilitación, de acordo co establecido no artigo 27.1.1.º f) da Lei 20/1991, dun establecemento turístico, situadas ambas nunha área cuxa oferta turística se atope en declive, por precisar de

intervencións integradas de rehabilitación de áreas urbanas, segundo os termos en que se define nas directrices de ordenación xeral de Canarias, aprobadas pola Lei 19/2003, do 14 de abril.

Para os efectos do imposto xeral indirecto canario, a base imponible correspondente á entrega de solo determinarase rateando a contraprestación entre o valor catastral do solo e da construción, sempre e cando no municipio onde este radique fose revisado o valor catastral. En caso contrario, a base imponible determinarase en proporción ao valor de mercado do solo.

Para os efectos do imposto sobre transmisións patrimoniais e actos xurídicos documentados, na determinación da base imponible correspondente á transmisión de solo, o valor real ratearase entre o valor catastral do solo e a construción, sempre e cando no municipio onde este radique fose revisado o valor catastral.

Regulamentariamente determinaranse os termos en que se entenda que se produce a creación ou ampliación dun establecemento e a diversificación e a transformación substancial da súa produción.

Os elementos do inmovilizado material a que se refire esta letra a) deberán, ademais, ter a consideración de bens de investimento de acordo co disposto no artigo 40, números 8 e 9, da Lei 20/1991.

b) Tratándose de elementos do inmovilizado inmaterial, a exención será aplicable en relación coa adquisición do dereito de uso de propiedade industrial ou intelectual, de coñecementos non patentados, nos termos que regulamentariamente se determinen, e coas concesións administrativas que, adicionalmente, deberán reunir os requisitos seguintes:

Ser utilizados exclusivamente no establecemento que reúna as condicións indicadas na letra a) anterior. Unicamente se entenderá que se produce tal utilización neste establecemento cando os citados elementos se destinen directa e exclusivamente á realización de operacións que se entendan efectuadas nas illas Canarias conforme as regras de localización do imposto xeral indirecto canario.

Ser amortizables.

Ser adquiridos a terceiros en condicións de mercado. No caso das concesións administrativas, entenderase que son adquiridas en condicións de mercado cando sexan obxecto dun procedemento de concorrencia competitiva.

Figurar no activo da empresa.

4. Sen prexuízo dos requisitos establecidos nos puntos anteriores, as exencións reguladas neste artigo están sometidas ao cumprimento das seguintes condicións:

a) Os bens de investimento deben ser novos, salvo que o adquirente ou importador cumpra as condicións do artigo 108 do texto refundido da Lei do imposto sobre sociedades, en cuxo caso os bens de investimento poderán ser usados, sempre que estes non se beneficiasen anteriormente das exencións previstas neste artigo. O requisito de ben de investimento novo non será de aplicación en relación co solo.

b) No caso da constitución de sociedades e da ampliación de capital, a adquisición ou a importación débese producir nun prazo de tres meses contados desde a data do outorgamento da correspondente escritura pública e destinarse á adquisición ou importación de bens de investimento ou á adquisición ou cesión de elementos do inmovilizado inmaterial.

c) Os bens de investimento e os elementos do inmovilizado inmaterial deberán entrar en funcionamento nun prazo de tres meses contados desde a data da súa adquisición ou importación. No caso de solo destinado á promoción de vivendas protexidas para o seu arrendamento pola propia entidade promotora, de bens para cuxa posta en funcionamento sexa necesario o remate da súa instalación ou montaxe, ou de bens que vaian ser utilizados en actividades económicas cuxo desenvolvemento exixa autorización administrativa, as actividades de promoción, de instalación ou montaxe, ou de consecución dos permisos administrativos e proxectos técnicos previos que fosen, de ser o caso, necesarios para a promoción ou desenvolvemento das actividades económicas, deberán ser acometidas inmediatamente, sen que se produza descontinuidade entre as diferentes actuacións.

d) Os bens de investimento e os elementos do inmovilizado inmaterial deberán estar situados ou ser recibidos no arquipélago canario, utilizados nel, afectos e necesarios para o desenvolvemento de actividades económicas da entidade. Para estes efectos entenderanse situados e utilizados no arquipélago:

As redes de transporte e de comunicacións que conecten o arquipélago canario co exterior, polo treito que se encontre dentro do territorio das illas Canarias e a parte situada fóra del que se utilice para conectar entre si as distintas illas do arquipélago.

As aplicacións informáticas e os dereitos de propiedade industrial que non sexan simples signos distintivos da entidade ou dos seus produtos e que se vaian aplicar exclusivamente en procesos produtivos ou actividades comerciais que se desenvolvan no ámbito territorial canario, así como os dereitos de propiedade intelectual que sexan obxecto de reprodución e distribución no arquipélago canario.

As concesións administrativas de uso de bens de dominio público radicados en Canarias.

As concesións administrativas de prestación de servizos públicos que se desenvolvan exclusivamente no arquipélago.

As concesións administrativas de obra pública para a execución ou explotación de infraestruturas públicas radicadas en Canarias.

e) Os bens de investimento e os elementos do inmovilizado inmaterial deberán permanecer en funcionamento na mesma entidade adquirente, importadora ou cesionaria, durante cinco anos como mínimo, sen ser obxecto de transmisión, arrendamento ou cesión a terceiros para o seu uso. Cando a súa vida útil fose inferior ao dito período, non se considerará incumprido este requisito cando se proceda á adquisición doutro ben de investimento que o substitúa, que reúna os requisitos exixidos para a aplicación das exencións previstas neste artigo e que permaneza en funcionamento durante o tempo necesario para completar este período. Esta nova adquisición ou importación dará dereito ás exencións previstas neste artigo pola parte do seu valor que exceda do valor de adquisición do elemento patrimonial que se substitúe que determinase dereito á exención, cos límites previstos nos números 1 e 2 deste artigo en relación cos elementos do inmovilizado inmaterial.

Nos casos de perda do activo deberase proceder á súa substitución nos termos previstos no parágrafo anterior.

Tampouco se entenderá incumprido este requisito nos supostos de transmisións non suxeitas ao imposto xeral indirecto canario conforme o disposto

no artigo 9.1.º, letras a) e b), da Lei 20/1991, agás cando se trate de achegas non en diñeiro referidas no artigo 94 do texto refundido da Lei do imposto sobre sociedades. Nestes casos, a entidade adquirente subrogarase na posición da entidade transmitente e asumirá o cumprimento dos requisitos necesarios para consolidar o beneficio fiscal desfrutado por esta última, en relación coas exencións previstas neste artigo.

f) As entidades que se dediquen ao arrendamento ou cesión a terceiros para o seu uso de activos fixos e obteñan, como consecuencia diso, rendementos da actividade económica conforme o artigo 27 da Lei 35/2006, do 28 de novembro, do imposto sobre a renda das persoas físicas e de modificación parcial das leis dos impostos sobre sociedades, sobre a renda de non-residentes e sobre o patrimonio, poderán gozar da exención regulada neste artigo, sempre que non exista vinculación, directa ou indirecta, cos arrendatarios ou cesionarios destes bens, nos termos definidos no artigo 16, número 3, do texto refundido da Lei do imposto sobre sociedades, nin se trate de operacións de arrendamento financeiro.

Nos supostos de arrendamento de bens inmoables, ademais das condicións previstas no parágrafo anterior, a entidade deberá ter a consideración de empresa turística de acordo co previsto na Lei 7/1995, do 6 de abril, de ordenación do turismo de Canarias, tratarse do arrendamento de vivendas protexidas pola entidade promotora, de bens inmoables afectos para o desenvolvemento de actividades industriais incluídas nas divisións 1 á 4 da sección primeira das tarifas do imposto sobre actividades económicas, aprobadas polo Real decreto legislativo 1175/1990, do 28 de setembro, polo cal se aproban as tarifas e a instrución do imposto sobre actividades económicas, ou de zonas comerciais situadas en áreas cuxa oferta turística se encontre en declive, por precisar de intervencións integradas de rehabilitación de áreas urbanas, segundo os termos en que se define nas directrices de ordenación xeral de Canarias, aprobadas pola Lei 19/2003, do 14 de abril.

g) Só poderán acollerse ás exencións previstas no presente artigo os elementos de transporte que obxectivamente considerados sexan de exclusiva aplicación industrial, comercial, agraria, clínica ou científica, sempre que os seus modelos de serie ou os vehículos individualmente fosen debidamente homologados pola Administración tributaria canaria e sempre que non se destinen á prestación de servizos de transporte a terceiros.

h) As entidades adquirentes ou importadoras de bens de investimento ou adquirentes ou cesionarias de elementos do inmovilizado inmaterial deberán manter como mínimo o seu domicilio fiscal ou o seu establecemento permanente nas illas Canarias durante un prazo de cinco anos contados desde a data do inicio da utilización efectiva ou da entrada en funcionamento dos bens de investimento ou desde a adquisición ou cesión dos elementos do inmovilizado inmaterial. Ao tratarse de entidades arrendadoras de vivendas protexidas, este prazo será de dez anos.

5. No imposto xeral indirecto canario, e con carácter previo ou simultáneo á entrega dun ben de investimento ou á prestación de servizos de cesión de elementos do inmovilizado inmaterial, a entidade adquirente ou cesionaria deberalle entregar ao empresario ou profesional transmitente ou cedente unha declaración en que identifique os bens de

investimento ou os elementos do inmovilizado inmaterial e manifeste a concorrencia dos requisitos da exención previstos neste artigo, en especial a súa condición de suxeito pasivo sen dereito á dedución total do imposto xeral indirecto canario soportado. No caso de que a entrega do ben de investimento ou a prestación de servizos de cesión do elemento do inmovilizado inmaterial se formalice en escritura pública, esta declaración deberase obrigatoriamente incorporar a esta última.

No suposto de investimento do suxeito pasivo previsto no artigo 19.1.2.º da Lei 20/1991, non será necesaria a emisión da declaración a que se refire o parágrafo anterior.

No caso de importacións, a entidade importadora deberá achegar coa declaración de importación a documentación acreditativa da concorrencia dos requisitos da exención nos mesmos termos expresados no primeiro parágrafo dese punto.

A declaración prevista neste punto deberase presentar con ocasión da realización do primeiro pagamento anticipado.

6. No imposto xeral indirecto canario, as entidades adquirentes ou cesionarias terán a condición de suxeitos pasivos substitutos nos termos previstos no artigo 36 da Lei 58/2003, do 17 de decembro, xeral tributaria, no caso de que, tendo expedido a declaración a que se refire o número 5 deste artigo, non se cumpran os requisitos da exención. O substituto non poderá exixir do contribuínte o importe das obrigas tributarias satisfeitas.

7. O incumprimento dos requisitos exixidos para a aplicación das exencións reguladas neste artigo terá as consecuencias previstas na Lei 58/2003.

No caso do incumprimento dos requisitos previstos para a exención no imposto sobre transmisións patrimoniais e actos xurídicos documentados e en aplicación do previsto no número 2 do artigo 122 da Lei 58/2003, presentarase autoliquidación no prazo dun mes contado desde o día seguinte á data de incumprimento. Liquidaranse xuros de demora nos termos previstos na Lei 58/2003 e na súa normativa de desenvolvemento.

No caso do incumprimento dos requisitos previstos para a exención no imposto xeral indirecto canario e en aplicación do previsto no número 2 do artigo 122 da Lei 58/2003, a autoliquidación, incluso no caso de importacións, realizarase a través da autoliquidación ocasional a que se refire o artigo 59.3 da Lei 20/1991 correspondente ao período de liquidación en que se producise o incumprimento. Liquidaranse xuros de demora nos termos previstos na Lei 58/2003 e na súa normativa de desenvolvemento.

Cando o incumprimento dos requisitos exixidos para a aplicación das exencións reguladas neste artigo se puxese de manifesto durante o desenvolvemento dun procedemento de verificación de datos, comprobación limitada ou de inspección, a liquidación de xuros de demora producirase nos termos previstos na Lei 58/2003 e na súa normativa de desenvolvemento.

8. Non poderán ser obxecto de dedución as cotas do imposto xeral indirecto canario liquidadas no desenvolvemento dun procedemento de verificación de datos, comprobación limitada ou de inspección, cando a conduta do suxeito pasivo sexa constitutiva de infracción tributaria.

9. As entidades adquirentes ou importadoras de bens de investimento ou cesionarias de elementos do inmovilizado inmaterial, así como os empresarios ou profesionais transmitentes dos bens de investimento ou cedentes dos elementos do inmovilizado

inmaterial, que estean establecidos en Canarias, deberán presentar anualmente unha declaración na cal se especificarán o número e o importe total das operacións exentas do imposto xeral indirecto canario conforme as previsións deste artigo, realizadas no ano natural, na forma e nos prazos que estableza regulamentariamente o Goberno de Canarias.

10. Regulamentariamente determinaranse os prazos e as condicións para que as entidades notifiquen os investimentos no sector da transformación e comercialización de produtos agrícolas, cando o seu importe sexa superior a vinte e cinco millóns de euros ou cando o correspondente á cota polos impostos que se xerasen en caso de non ter sido de aplicación as medidas fiscais reguladas nesta lei supere os doce millóns de euros.»

Dous. Con efectos para os períodos impositivos que se inicien a partir do 1 de xaneiro de 2007, modifícase o artigo 26, que queda redactado como segue:

«Artigo 26. *Réxime especial das empresas produtoras de bens corporais.*

1. Os suxeitos pasivos do imposto sobre sociedades aplicarán unha bonificación do cincuenta por cento da cota íntegra correspondente aos rendementos derivados da venda de bens corporais producidos en Canarias por eles mesmos, propios de actividades agrícolas, gandeiras, industriais e pesqueiras, sempre que, neste último caso, a pesca de altura se desembarque nos portos canarios e se manipule ou transforme no arquipélago. Poderanse beneficiar desta bonificación as persoas ou entidades domiciliadas en Canarias ou noutros territorios que se dediquen á produción de tales bens no arquipélago, mediante sucursal ou establecemento permanente.

2. A bonificación anterior tamén lles será aplicable aos contribuíntes do imposto sobre a renda das persoas físicas que exerzan as mesmas actividades e cos mesmos requisitos exixidos aos suxeitos pasivos do imposto sobre sociedades, sempre e cando determinen os rendementos polo método de estimación directa.

A bonificación aplicarase sobre a parte da cota íntegra que proporcionalmente lles corresponda aos rendementos derivados das actividades de produción sinaladas.»

Tres. Con efectos para os períodos impositivos que se inicien a partir do 1 de xaneiro de 2007, modifícase o artigo 27, que queda redactado como segue:

«Artigo 27. *Reserva para investimentos en Canarias.*

1. As entidades suxeitas ao imposto sobre sociedades terán dereito á redución na base imponible das cantidades que, con relación aos seus establecementos situados en Canarias, destinen dos seus beneficios á reserva para investimentos de acordo co disposto neste artigo.

As entidades que teñan por actividade principal a prestación de servizos financeiros ou a prestación de servizos a entidades que pertencen ao mesmo grupo de sociedades no sentido do número 3 do artigo 16 do texto refundido da Lei do imposto sobre sociedades, unicamente poderán disfrutar da redución prevista no parágrafo anterior cando materialicen os importes destinados á reserva nos investimentos previstos nas letras A, B e, se é o caso, nas condicións que poidan establecerse regulamentariamente, no número 1.º da letra D do número 4 deste artigo.

2. A redución a que se refire o parágrafo anterior aplicaráselles ás dotacións que en cada período impositivo se fagan á reserva para investimentos ata o límite do noventa por cento da parte de beneficio obtido no mesmo período que non sexa obxecto de distribución, en canto proceda de establecementos situados en Canarias.

En ningún caso a aplicación da redución poderá determinar que a base imponible sexa negativa.

Para estes efectos, consideraranse beneficios procedentes de establecementos en Canarias os derivados de actividades económicas, incluídos os procedentes da transmisión dos elementos patrimoniais afectos a estas, nos termos que regulamentariamente se determinen.

Para estes efectos consideraranse beneficios non distribuídos os destinados a nutrir as reservas, excluída a de carácter legal. Non terá a consideración de beneficio non distribuído:

a) O correspondente ás rendas que se beneficiasen da dedución establecida no artigo 42 do texto refundido da Lei do imposto sobre sociedades.

b) O que derive da transmisión de elementos patrimoniais cuxa adquisición determinase a materialización da reserva para investimentos regulada neste artigo.

c) O que derive da transmisión de elementos patrimoniais do activo fixo non afectos á realización de actividades económicas. Para estes efectos, non terán a consideración de elementos patrimoniais afectos os activos representativos da participación en fondos propios dunha entidade e da cesión a terceiros de capitais propios.

As asignacións a reservas consideraranse diminuídas no importe que eventualmente se detraese dos fondos propios, quer no exercicio a que a redución da base imponible se refire, quer no que se adoptase o acordo de realizar as mencionadas asignacións.

3. A reserva para investimentos deberá figurar nos balances con absoluta separación e título apropiado e non será dispoñible mentres que os bens en que se materializou deban permanecer na empresa.

4. As cantidades destinadas á reserva para investimentos en Canarias deberanse materializar no prazo máximo de tres anos, contados desde a data de xeración do imposto correspondente ao exercicio en que esta se dotou, na realización dalgún dos seguintes investimentos:

A. Os investimentos iniciais consistentes na adquisición de elementos patrimoniais novos do activo fixo material ou inmaterial como consecuencia:

Da creación dun establecemento.

Da ampliación dun establecemento.

Da diversificación da actividade dun establecemento para a elaboración de novos produtos.

Da transformación substancial no proceso de produción dun establecemento.

Tamén terán a consideración de iniciais os investimentos en solo, edificado ou non, sempre que non se beneficiasen anteriormente do réxime previsto neste artigo e se afecte:

Á promoción de vivendas protexidas, cando proceda esta cualificación de acordo co previsto no Decreto 27/2006, do 7 de marzo, polo que se regulan as actuacións do Plan de Vivenda de Canarias, e sexan destinadas ao arrendamento pola sociedade promotora.

Ao desenvolvemento de actividades industriais incluídas nas divisións 1 a 4 da sección primeira

das tarifas do imposto sobre actividades económicas, aprobadas polo Real decreto legislativo 1175/1990, do 28 de setembro, polo que se aproban as tarifas e a instrución do imposto sobre actividades económicas.

As zonas comerciais e ás actividades turísticas reguladas na Lei 7/1995, do 6 de abril, de ordenación do turismo de Canarias, cuxa adquisición teña por obxecto a rehabilitación dun establecemento turístico, situadas ambas nunha área cuxa oferta turística se encontre en declive, por precisar de intervencións integradas de rehabilitación de áreas urbanas, segundo os termos en que se define nas directrices de ordenación xeral de Canarias, aprobadas pola Lei 19/2003, do 14 de abril, pola que se aproban as directrices de ordenación xeral e as directrices de ordenación do turismo de Canarias.

Tratándose de elementos de transporte, deberán destinarse ao uso interno da empresa en Canarias, segundo se determina no punto 5 deste artigo, sen que se poidan utilizar para a prestación de servizos de transporte a terceiros.

No caso de activo fixo inmaterial, deberá tratarse de dereitos de uso de propiedade industrial ou intelectual, coñecementos non patentados, nos termos que regulamentariamente se determinen, e de concesións administrativas, e reunir os seguintes requisitos:

Utilizarse exclusivamente no establecemento que reúna as condicións indicadas nesta letra.

Ser amortizable.

Ser adquirido a terceiros en condicións de mercado. No caso das concesións administrativas entenderase que son adquiridas en condicións de mercado cando sexan obxecto dun procedemento de concorrencia competitiva.

Figurar no activo da empresa.

Tratándose de suxeitos pasivos que cumpran as condicións do artigo 108 do texto refundido da Lei do imposto sobre sociedades, no período impositivo en que se obtén o beneficio con cargo ao cal se dota a reserva, o investimento poderá consistir na adquisición de activos fixos usados, sempre que os bens adquiridos non se beneficiasen anteriormente do réxime previsto neste artigo. Tratándose de solo, deberánse cumprir en todo caso as condicións previstas nesta letra.

Reglamentariamente determinaranse os termos en que se entenda que se produce a creación ou ampliación dun establecemento e a diversificación e a transformación substancial da súa produción.

B. A creación de postos de traballo relacionada de forma directa cos investimentos previstos na letra A, que se produza dentro dun período de seis meses contado desde a data de entrada en funcionamento deste investimento.

A creación de postos de traballo determinarase polo incremento do cadro de persoal medio total do suxeito pasivo producido neste período respecto do cadro de persoal medio dos 12 meses anteriores á data da entrada en funcionamento do investimento, sempre que este incremento se manteña durante un período de cinco anos, salvo no caso de suxeitos pasivos que cumpran as condicións do artigo 108 do texto refundido da Lei do imposto sobre sociedades, no período impositivo en que se obtén o beneficio con cargo ao cal se dota a reserva, quen deberá manter este incremento durante tres anos.

Para o cálculo do cadro de persoal medio total da empresa e do seu incremento tomaranse as per-

soas empregadas, nos termos que dispoña a lexislación laboral, tendo en conta a xornada contratada en relación coa xornada completa.

C. A adquisición de elementos patrimoniais do activo fixo material ou inmaterial que non poida ser considerada como investimento inicial por non reunir algunha das condicións establecidas na letra A anterior, o investimento en activos que contribúan á mellora e protección do ambiente no territorio canario, así como aqueles gastos de investigación e desenvolvemento que regulamentariamente se determinen.

Tratándose de vehículos de transporte de pasaxeiros por vía marítima ou por estrada, deberanse dedicar exclusivamente a servizos públicos no ámbito de funcións de interese xeral que se correspondan coas necesidades públicas das illas Canarias.

Tratándose de solo, edificado ou non, este debe afectarse:

Á promoción de vivendas protexidas, cando proceda esta cualificación de acordo co previsto no Decreto 27/2006, do 7 de marzo, polo que se regulan as actuacións do Plan de Vivenda de Canarias, destinadas ao arrendamento pola sociedade promotora.

Ao desenvolvemento de actividades industriais incluídas nas divisións 1 a 4 da sección primeira das tarifas do imposto sobre actividades económicas, aprobadas polo Real decreto lexislativo 1175/1990, do 28 de setembro, polo que se aproban as tarifas e a instrución do imposto sobre actividades económicas.

As zonas comerciais, e ás actividades turísticas reguladas na Lei 7/1995, do 6 de abril, de ordenación do turismo de Canarias, cuxa adquisición teña por obxecto a rehabilitación dun establecemento turístico, situadas ambas nunha área cuxa oferta turística se encontre en declive, por precisar de intervencións integradas de rehabilitación de áreas urbanas, segundo os termos en que se define nas directrices de ordenación xeral de Canarias, aprobadas pola Lei 19/2003, do 14 de abril.

#### D. A subscrición de:

1.º Accións ou participacións no capital emitidas por sociedades como consecuencia da súa constitución ou ampliación de capital que desenvolvan no arquipélago a súa actividade, sempre que se cumpran os seguintes requisitos:

Estas sociedades realizarán os investimentos previstos nas letras A e B anteriores, nas condicións reguladas neste artigo. Sempre que tanto a entidade subscriptora do capital como a que efectúa o investimento cumpran as condicións do artigo 108 do texto refundido da Lei do imposto sobre sociedades, no período impositivo no cal se obtén o beneficio con cargo ao cal se dota a reserva, será posible efectuar os investimentos das citadas letras A e B nos termos e condicións previstos para este tipo de suxeitos pasivos.

Estas sociedades deberán efectuar estes investimentos no prazo de tres anos contado desde a data da xeración do imposto correspondente ao exercicio en que o suxeito pasivo que adquire as accións ou as participacións no seu capital dotase a reserva regulada neste artigo.

Os activos así adquiridos deberanse manter en funcionamento en Canarias nos termos previstos neste artigo.

O importe do valor de adquisición dos investimentos realizados pola sociedade participada deberá alcanzar, como mínimo, o importe desem-

bolsado das accións ou participacións adquiridas polo suxeito pasivo.

Os investimentos realizados pola sociedade participada non darán lugar á aplicación de ningún outro beneficio fiscal, salvo os previstos no artigo 25 desta lei.

Para estes efectos, a entidade subscriptora do capital procederá a comunicarlle á sociedade emisora de xeito que faga fe o valor nominal das accións ou participacións adquiridas así como a data en que remata o prazo para a materialización do seu investimento. A sociedade emisora comunicarlle de maneira que faga fe á entidade subscriptora do seu capital os investimentos efectuados con cargo ás súas accións ou participacións cuxa subscrición supuxese a materialización da reserva así como a súa data. Os investimentos realizados entenderanse financiados cos fondos derivados das accións ou participacións emitidas segundo a orde en que se produce o seu desembolso efectivo. No caso de desembolsos efectuados na mesma data, considerase que contribúen de forma proporcional ao financiamento do investimento.

2.º Accións ou participacións no capital emitidas por entidades da Zona Especial Canaria como consecuencia da súa constitución ou ampliación de capital, sempre que se cumpra cos requisitos e condicións establecidos no número 1.º anterior desta letra D e os previstos no capítulo I do título V desta lei. Adicionalmente, deberanse reunir as seguintes condicións:

O importe da emisión ou da ampliación de capital será superior a 750.000 euros.

Polo menos o 10% da emisión ou da ampliación de capital será subscrito por algunha persoa ou entidade que non materialice cantidades destinadas á reserva para investimentos en Canarias e será desembolsado de maneira inmediata logo do outorgamento da escritura de constitución ou ampliación de capital.

A persoa ou entidade que subscriba as accións ou participacións emitidas non poderá transmitir ou ceder o uso a terceiros dos activos afectos á súa actividade económica, existentes no exercicio anterior á subscrición, no dito exercicio ou nos catro exercicios posteriores, salvo que rematase a súa vida útil e se proceda á súa substitución ou que se trate de operacións realizadas no curso normal da súa actividade por suxeitos pasivos que se dediquen, a través dunha explotación económica, ao arrendamento ou cesión a terceiros para o seu uso de activos fixos, sempre que non exista vinculación, directa ou indirecta, cos arrendatarios ou cesionarios destes bens, nos termos definidos no número 3 do artigo 16 do texto refundido da Lei do imposto sobre sociedades, nin se trate de operacións de arrendamento financeiro. En ningún caso os poderá transmitir ou ceder o seu uso á entidade da Zona Especial Canaria cuxas accións subscriba nin a outra persoa vinculada con esta última nos termos anteriormente indicados.

A persoa ou entidade que subscriba as accións ou participacións emitidas non procederá á redución do seu cadro de persoal medio total, existente no exercicio anterior á subscrición, nos catro exercicios posteriores. Para o cálculo do cadro de persoal medio total da empresa tomarán as persoas empregadas, nos termos que dispoña a lexislación laboral, tendo en conta a xornada contratada en relación coa xornada completa.

3.º Accións ou participacións no capital ou no patrimonio emitidas por sociedades e fondos de capital risco regulados na Lei 25/2005, do 24 de novembro, reguladora das entidades de capital-risco e as súas sociedades xestoras, e en fondos de investimentos regulados na Lei 35/2003, do 4 de novembro, de institucións de investimento colectivo, como consecuencia da súa constitución ou ampliación de capital, sempre que as entidades de capital risco e os fondos de investimento participados invistan unha cantidade equivalente das participacións adquiridas en accións ou participacións representativas do capital das sociedades a que se refiren os números 1.º e 2.º desta letra que cumpran cos requisitos alí establecidos, emitidas con ocasión da súa constitución ou ampliación de capital.

Para estes efectos, a entidade subscriptora do capital procederá a comunicarlle de maneira que faga fe á entidade xestora da entidade de capital risco ou do fondo de investimento correspondente o valor nominal das accións ou participacións adquiridas así como a data en que remata o prazo para a materialización do seu investimento, que llo comunicará de xeito que faga fe pola súa vez á sociedade que realice os investimentos previstos nas letras A e B deste parágrafo. Esta última comunicarlle de xeito que faga fe á entidade xestora os investimentos efectuados así como a súa data, que llo comunicará de maneira que faga fe pola súa vez á sociedade subscriptora das accións ou participacións da entidade de capital risco ou do fondo de investimento. Os investimentos realizados entenderanse financiados cos fondos derivados das accións ou participacións emitidas segundo a orde en que se producise o seu desembolso efectivo. No caso de desembolsos efectuados na mesma data, considerarase que contribúen de forma proporcional ao financiamento do investimento.

Os investimentos realizados pola sociedade participada pola entidade de capital risco ou polo fondo de investimento non darán lugar á aplicación de ningún outro beneficio fiscal, agás os previstos no artigo 25 desta lei.

4.º Títulos valores de débeda pública da Comunidade Autónoma de Canarias, das corporacións locais canarias ou das súas empresas públicas ou organismos autónomos, sempre que esta se destine a financiar investimentos en infraestrutura e equipamento ou de mellora e protección do medio no territorio canario, co límite do cincuenta por cento das dotacións efectuadas en cada exercicio.

Para estes efectos, o Goberno da nación aprobará a contía e o destino das emisións, a partir das propostas que en tal sentido lle formule a Comunidade Autónoma de Canarias, logo do informe do Comité de Investimentos Públicos.

5.º Títulos valores emitidos por organismos públicos que procedan á construción ou explotación de infraestruturas ou equipamentos de interese público para as administracións públicas en Canarias, cando o financiamento obtido con esta emisión se destine de forma exclusiva a tal construción ou explotación, co límite do cincuenta por cento das dotacións efectuadas en cada exercicio.

Para estes efectos, o Goberno da nación aprobará a contía e o destino das emisións, a partir das propostas que en tal sentido lle formule a Comunidade Autónoma de Canarias, logo do informe do Comité de Investimentos Públicos.

6.º Títulos valores emitidos por entidades que procedan á construción ou explotación de infraestruturas ou equipamentos de interese público para

as administracións públicas en Canarias, unha vez obtida a correspondente concesión administrativa ou título administrativo habilitante, cando o financiamento obtido con esta emisión se destine de forma exclusiva a tal construción ou explotación, co límite do cincuenta por cento das dotacións efectuadas en cada exercicio e nos termos que se prevexan regulamentariamente. A emisión dos correspondentes títulos valores estará suxeita a autorización administrativa previa por parte da Administración competente para o outorgamento do correspondente título administrativo habilitante.

Para estes efectos e cando se trate de entidades do sector público, o Goberno da nación aprobará a contía e o destino das emisións, a partir das propostas que en tal sentido lle formule, se for o caso, a Comunidade Autónoma de Canarias, logo de informe do Comité de Investimentos Públicos.

5. Os activos en que se materialice o investimento deberán estar situados ou ser recibidos no arquipélago canario, utilizados nel, afectos e necesarios para o desenvolvemento de actividades económicas do suxeito pasivo, salvo no caso dos que contribúan á mellora e protección do medio no territorio canario.

Para tal efecto entenderanse situados e utilizados no arquipélago:

As aeronaves que, polo seu destino, contribúan a mellorar as conexións das illas Canarias, nos termos que regulamentariamente se determinen.

Os buques con pavillón español e matriculados en Canarias, incluídos os inscritos no Rexistro Especial de Buques e Empresas Navieiras.

As redes de transporte e de comunicacións que conecten o arquipélago canario co exterior, polo tramo desta que se encontre dentro do territorio das illas Canarias e a parte situada fóra deste que se utilice para conectar entre si as distintas illas do arquipélago.

As aplicacións informáticas e os dereitos de propiedade industrial, que non sexan simples signos distintivos do suxeito pasivo ou dos seus produtos e que se vaian aplicar exclusivamente en procesos produtivos ou actividades comerciais que se desenvolvan no ámbito territorial canario, así como os dereitos de propiedade intelectual que sexan obxecto de reprodución e distribución exclusivamente no arquipélago canario.

As concesións administrativas de uso de bens de dominio público radicados en Canarias.

As concesións administrativas de prestación de servizos públicos que se desenvolvan exclusivamente no arquipélago.

As concesións administrativas de obra pública para a execución ou explotación de infraestruturas públicas radicadas en Canarias.

6. Entenderase que o importe da materialización alcanzará o prezo de adquisición ou custo de produción dos elementos patrimoniais, con exclusión dos intereses, impostos estatais indirectos e as súas recargas, sen que poida resultar superior ao seu valor de mercado.

No caso de redes de transporte e comunicacións que conecten o arquipélago canario co exterior, o importe da materialización alcanzará o valor de adquisición ou custo de produción do tramo desta que se encontre dentro do territorio das illas Canarias e a parte situada fóra deste que se utilice para conectar entre si as distintas illas do arquipélago.

No caso dos investimentos previstos na letra A do número 4 deste artigo, o importe da materializa-



ción da reserva en elementos patrimoniais do inmaterializado inmaterial non poderá exceder do cincuenta por cento do valor total do proxecto de investimento do cal formen parte, agás que se trate de suxeitos pasivos que cumpran as condicións do artigo 108 do texto refundido da Lei do imposto sobre sociedades, no período impositivo en que se obtén o beneficio con cargo ao cal se dota a reserva.

Computarase o cincuenta por cento do importe dos custos de estudos preparatorios e de consultoría, cando estean directamente relacionados cos investimentos previstos na letra A do número 4 deste artigo e se trate de suxeitos pasivos que cumpran as condicións do artigo 108 do texto refundido da Lei do imposto sobre sociedades, no período impositivo en que se obtén o beneficio con cargo ao cal se dota a reserva.

Nos casos de creación de postos de traballo, considerarase producida a materialización unicamente durante os dous primeiros anos desde que se produce o incremento de cadro de persoal e computarase, en cada período impositivo, polo importe do custo medio dos salarios brutos e as cotizacións sociais obrigatorias que se corresponda con este incremento.

O importe da materialización da reserva en gastos de investigación e desenvolvemento tamén alcanzará os proxectos contratados con universidades, organismos públicos de investigación ou centros de innovación e tecnoloxía, oficialmente recoñecidos e rexistrados e situados en Canarias.

No caso das accións, participacións ou títulos valores a que se refire a letra D do número 4 deste artigo, considerarase producida a materialización no importe desembolsado con ocasión da súa subscripción. No caso de accións ou participacións, tamén terá esta consideración o importe desembolsado en concepto de prima de emisión.

A parte do investimento financiada con subvencións non se considerará como importe de materialización da reserva.

7. Entenderase producida a materialización, incluso nos casos da adquisición mediante arrendamento financeiro, no momento en que os activos entren en funcionamento.

8. Os activos en que se materializase a reserva para investimentos a que se refiren as letras A e C do número 4, así como os adquiridos polas sociedades participadas a que se refire a letra D dese mesmo parágrafo, deberán permanecer en funcionamento na empresa do adquirente durante cinco anos como mínimo, sen ser obxecto de transmisión, arrendamento ou cesión a terceiros para o seu uso. Cando a súa vida útil fose inferior ao dito período, non se considerará incumprido este requisito cando se proceda á adquisición doutro elemento patrimonial que o substitúa, que reúna os requisitos exixidos para a aplicación da redución prevista neste artigo e que permaneza en funcionamento durante o tempo necesario para completar este período. Non se poderá entender que esta nova adquisición supón a materialización das cantidades destinadas á reserva para investimentos en Canarias, salvo polo importe dela que excede do valor do elemento patrimonial que se substitúe e que tivo a consideración de materialización da reserva regulada neste artigo. No caso da adquisición de solo, o prazo será de dez anos.

Nos casos de perda do activo deberase proceder á súa substitución nos termos previstos no parágrafo anterior.

Os suxeitos pasivos que se dediquen á actividade económica de arrendamento ou cesión a terceiros para o seu uso de activos fixos poderán des-

frutar do réxime da reserva para investimentos, sempre que non exista vinculación, directa ou indirecta, cos arrendatarios ou cesionarios destes bens, nos termos definidos no artigo 16, número 3, do texto refundido da Lei do imposto sobre sociedades, nin se trate de operacións de arrendamento financeiro. Para estes efectos, entenderase que o arrendamento de inmobles se realiza como actividade económica unicamente cando concorran as circunstancias previstas no número 2 do artigo 27 da Lei 35/2006.

Nos supostos de arrendamento de bens inmobles, ademais das condicións previstas no parágrafo anterior, o suxeito pasivo deberá ter a consideración de empresa turística de acordo co previsto na Lei 7/1995, do 6 de abril, de ordenación do turismo de Canarias, tratarse do arrendamento de vivendas protexidas pola sociedade promotora, de bens inmobles afectos ao desenvolvemento de actividades industriais incluídas nas divisións 1 a 4 da sección primeira das tarifas do imposto sobre actividades económicas, aprobadas polo Real decreto legislativo 1175/1990, do 28 de setembro, polo que se aproban as tarifas e a instrución do imposto sobre actividades económicas, ou de zonas comerciais situadas en áreas cuxa oferta turística se encontre en declive, por precisar de intervencións integradas de rehabilitación de áreas urbanas, segundo os termos en que se define nas directrices de ordenación xeral de Canarias, aprobadas pola Lei 19/2003, do 14 de abril.

Cando se trate dos valores a que se refire a letra D do número 4, deberán permanecer no patrimonio do suxeito pasivo durante cinco anos ininterrompidos, sen que os dereitos de uso ou desfrute asociados a eles poidan ser obxecto de cesión a terceiros.

9. Os investimentos en que se materialice a reserva poderanse financiar mediante os contratos de arrendamento financeiro a que se refire o artigo 115 do texto refundido da Lei do imposto sobre sociedades, en cuxo caso a redución na base imponible quedará condicionada ao exercicio efectivo da opción de compra.

10. Os suxeitos pasivos deberán presentar un plan de investimentos para a materialización da reserva, que se deberá xuntar á declaración polo imposto correspondente ao período impositivo en que se practica a redución prevista neste artigo.

O plan que teña por obxecto algún dos investimentos previstos nas letras A, B, C e D, números 1.º e 2.º, describirá a finalidade do investimento, os termos en que afectará o desenvolvemento da súa explotación e as variacións que se poidan producir no emprego e indicará, de forma aproximada, o prazo de execución e os elementos patrimoniais que deban ser adquiridos, coa inclusión do valor de adquisición ou custo de produción estimado e o período previsto para a súa entrada en funcionamento. Así mesmo, referirase aos investimentos anticipados que se realizasen con anterioridade á dotación da reserva, nos termos previstos no número 11 deste artigo.

O plan que teña por obxecto o investimento na subscripción de títulos valores referidos nos números 3.º, 4.º, 5.º e 6.º da letra D do número 4 deste artigo, identificará a entidade emisora dos títulos e o valor dos títulos polo cal se solicitará a subscripción e que determinará a materialización da reserva.

Cando se probe que, polas súas características técnicas, o investimento deba efectuarse necesariamente nun prazo superior ao previsto no número 4 deste artigo, os suxeitos pasivos deberán presen-

tar adicionalmente un plan especial de investimento que se deberá xuntar á declaración polo imposto en que se practica a redución prevista neste artigo, sempre que se inicie esta dentro do prazo indicado no dito parágrafo e alcance dentro do dito período un vinte e cinco por cento do seu importe total.

Regulamentariamente establecerase o contido dos plans de investimento, o procedemento para a súa presentación e o órgano da Administración tributaria competente para a aprobación dos plans especiais de investimento.

11. Os suxeitos pasivos a que se refire este artigo poderán levar a cabo investimentos anticipados, que se considerarán como materialización da reserva para investimentos que se dote con cargo a beneficios obtidos no período impositivo en que se realiza o investimento ou nos tres posteriores, sempre que se cumpran os restantes requisitos exixidos nel.

As citadas dotacións deberanse realizar con cargo a beneficios obtidos ata o 31 de decembro de 2013.

A citada materialización e o seu sistema de financiamento comunicaranse conxuntamente coa declaración do imposto sobre sociedades, o imposto sobre a renda de non-residentes ou o imposto sobre a renda das persoas físicas do período impositivo en que se realicen os investimentos anticipados.

12. A aplicación do beneficio da reserva para investimentos será incompatible, para os mesmos bens e gastos, coas deducións para incentivar a realización de determinadas actividades reguladas no capítulo IV do título VI do texto refundido da Lei do imposto sobre sociedades e coa dedución por investimentos regulada no artigo 94 da Lei 20/1991.

Tratándose de activos usados e de solo, estes non se poderán ter beneficiado anteriormente do réxime previsto neste artigo, nin das deducións para incentivar a realización de determinadas actividades reguladas no capítulo IV do título VI do texto refundido da Lei do imposto sobre sociedades, nin da dedución por investimentos regulada no artigo 94 da Lei 20/1991.

13. Mentres non se cumpra o prazo de mantemento a que se refire o número 8 deste artigo, os suxeitos pasivos farán constar na memoria das contas anuais a seguinte información:

a) O importe das dotacións efectuadas á reserva con indicación do exercicio en que se efectuaron.

b) O importe da reserva pendente de materialización, con indicación do exercicio en que se dotase.

c) O importe e a data dos investimentos, con indicación do exercicio en que se produciu a dotación da reserva, así como a identificación dos activos en que se materializa.

d) O importe e a data dos investimentos anticipados á dotación, previstos no número 11 deste artigo, o cal se fará constar a partir da memoria correspondente ao exercicio en que estas se materializaron.

e) O importe correspondente a calquera outro beneficio fiscal xerado con ocasión de cada investimento realizado como consecuencia da materialización da reserva regulada neste artigo.

f) O importe das subvencións solicitadas ou concedidas por calquera Administración pública con ocasión de cada investimento realizado como con-

secuencia da materialización da reserva regulada neste artigo.

Os suxeitos pasivos que non teñan obriga de levar contas anuais levarán un libro de rexistro de bens de investimento, no cal figurará a información requirida nas letras a) á e) anteriores.

En relación cos investimentos previstos nos números 1.º, 2.º e 3.º da letra D do número 4 deste artigo, a sociedade que realice calquera dos investimentos previstos nas súas letras A e B, así como as entidades xestoras das entidades de capital risco e dos fondos de investimento, mentres non se cumpra o prazo de mantemento a que se refire o número 8 deste artigo, farán constar na memoria das contas anuais o importe e a data dos investimentos efectuados que supoñan a materialización da reserva prevista neste artigo dotada pola entidade subscriptora das súas accións ou participacións, así como os exercicios durante os cales esta deba manterse en funcionamento.

14. A suma do importe da minoración da cota íntegra polo imposto que derive da aplicación da redución regulada neste artigo e de calquera outro beneficio fiscal ou subvención de calquera Administración pública, xerados ou concedidos con ocasión dun mesmo investimento dos previstos nas letras A, B e, se for o caso, no número 1.º da letra D do número 4 deste artigo, non poderá exceder dos límites previstos na normativa comunitaria para as axudas ao investimento.

Para computar o importe correspondente a un mesmo investimento, considerarase integrado nun proxecto único o conxunto de activos adquiridos nun prazo de tres anos que se integren nunha unidade autónoma determinante dunha explotación económica, é dicir, un conxunto capaz de funcionar polos seus propios medios.

15. Os contribuíntes do imposto sobre a renda das persoas físicas que determinen os seus rendementos netos mediante o método de estimación directa terán dereito a unha dedución na cota íntegra polos rendementos netos de explotación que se destinen á reserva para investimentos, sempre e cando estes proveñan de actividades económicas realizadas mediante establecementos situados en Canarias.

A dedución calcularase aplicándolles o tipo medio de gravame ás dotacións anuais á reserva e terá como límite o oitenta por cento da parte da cota íntegra que proporcionalmente lle corresponda á contía dos rendementos netos de explotación que proveñan de establecementos situados en Canarias.

Este beneficio fiscal aplicarase de acordo co disposto nos números 3 ao 14 deste artigo, nos mesmos termos que os exixidos ás sociedades e demais entidades xurídicas.

16. A disposición da reserva para investimentos con anterioridade á finalización do prazo de mantemento do investimento ou para investimentos diferentes aos previstos no punto 4 deste artigo, así como o incumprimento de calquera outro dos requisitos establecidos neste artigo, agás os contidos no seus puntos 3, 10 e 13, dará lugar a que o suxeito pasivo proceda á integración, na base impositiva do imposto sobre sociedades, na base impositiva do imposto sobre a renda das persoas físicas do exercicio en que ocorren estas circunstancias, das cantidades que no seu día deron lugar á redución daquela ou á dedución desta, sen prexuízo das sancións que resulten procedentes.

No caso do incumprimento da obriga do exercicio da opción de compra prevista nos contratos de arrendamento financeiro, a integración na base imponible terá lugar no exercicio en que contractualmente estivese previsto que esta debese exercerse.

Liquidaranse xuros de demora nos termos previstos na Lei 58/2003 e na súa normativa de desenvolvemento.

17. Constitúen infraccións tributarias graves os seguintes supostos:

a) A falta de contabilización da reserva para investimentos nos termos previstos no número 3 deste artigo, que será sancionada con multa pecuniaria proporcional do 2 por cento da dotación que se debese ter efectuado.

b) Non facer constar na memoria das contas anuais a información a que se refire o número 13 deste artigo, que será sancionada con multa pecuniaria proporcional do 2 por cento do importe das dotacións á reserva para investimentos que se debesen ter incluído.

c) Incluír datos falsos, incompletos ou inexactos na memoria das contas anuais a que se refire o número 13 deste artigo, que será sancionada con multa pecuniaria fixa de 500 euros por cada dato omitido, falso ou inexacto, cun mínimo de 5.000 euros.

Constitúen infraccións tributarias leves os seguintes supostos:

a) Non comunicar os datos ou comunicar datos falsos, incompletos ou inexactos a que se refire a letra D do número 4 deste artigo, que será sancionada con multa pecuniaria fixa de 150 euros por cada dato omitido, falso ou inexacto, cun mínimo de 500 euros.

b) A non-presentación do plan de investimento a que se refire o número 10 deste artigo, que será sancionada con multa pecuniaria proporcional do 2 por cento do importe da dotación efectuada á reserva para investimentos a cuxa materialización se debería ter referido.

c) A omisión, falseamento ou inexactitude dos datos que se deben conter no plan de investimento a que se refire o número 10 deste artigo sancionárase con multa pecuniaria fixa de 150 euros por cada dato omitido, falso ou inexacto, cun mínimo de 500 euros.

18. Regulamentariamente determinarase a información que deban subministrar os suxeitos pasivos que practiquen a redución prevista neste artigo xunto coa declaración polo imposto sobre sociedades, do imposto sobre a renda das persoas físicas ou do imposto sobre a renda de non-residentes, co obxecto de verificar que o importe das axudas e beneficios obtidos en relación cun mesmo investimento non excede dos límites establecidos no punto 14 deste artigo.

Regulamentariamente determinaranse os prazos e condicións para que o suxeito pasivo notifique os investimentos efectuados con cargo á reserva regulada neste artigo para a adquisición de elementos de transporte marítimo ou aéreo e os realizados, no sector da transformación e comercialización de produtos agrícolas, cando, neste último caso, o seu importe sexa superior a vinte e cinco millóns de euros ou o correspondente á cota polos impostos que se xerasen, cando non fosen de aplicación as medidas fiscais reguladas nesta lei, supere os doce millóns de euros.»

Catro. Con efectos a partir do 1 de xaneiro de 2007, modifícase o artigo 29, que queda redactado como segue:

«Artigo 29. *Vixencia da Zona Especial Canaria.*

1. A vixencia da Zona Especial Canaria terá como límite o 31 de decembro do ano 2019, prorrogable logo de autorización da Comisión Europea.

2. Non obstante, a autorización da inscrición no Rexistro Oficial de Entidades da Zona Especial Canaria terá como límite o 31 de decembro do ano 2013.

3. O mantemento da Zona Especial Canaria estará condicionado en todo caso ao resultado das revisións periódicas que deba realizar a Comisión Europea.»

Cinco. Con efectos a partir do 1 de xaneiro de 2007, modifícanse as letras d) e e) do punto 3 do artigo 31, que quedan redactadas como segue:

«d) Realizar investimentos nos dous primeiros anos desde a súa autorización, que se materialicen na adquisición de activos fixos materiais ou inmateriais, de ser o caso, situados ou recibidos no ámbito xeográfico da Zona Especial Canaria, utilizados nel e necesarios para o desenvolvemento das actividades económicas efectuadas polo contribuínte no dito ámbito xeográfico, por un importe mínimo de:

Nas illas de Gran Canaria e Tenerife, 100.000 euros.

Nas illas de El Hierro, Fuerteventura, La Gomera, Lanzarote e La Palma, 50.000 euros.

Non se computarán, para estes efectos, os activos fixos adquiridos mediante as operacións reguladas no capítulo VIII do título VII do texto refundido da Lei do imposto sobre sociedades.

Estes investimentos deberán cumprir as seguintes condicións:

a') Os activos adquiridos deberán permanecer na entidade da Zona Especial Canaria durante todo o período de desfrute deste réxime, ou durante a súa vida útil se fose inferior, sen ser obxecto de transmisión. Tampouco poderán ser obxecto de arrendamento ou cesión a terceiros para o seu uso, salvo que se trate do obxecto social ou actividade da entidade da Zona Especial Canaria, e sempre que non exista vinculación directa ou indirecta cos arrendatarios ou cesionarios dos ditos bens. Entenderase que non se incumpre o requisito de permanencia cando os bens sexan obxecto de transmisión e o importe se reinvesta en novos elementos do activo fixo nas mesmas condicións dentro do prazo dun ano.

b') Tratándose de activos usados, estes non se poderán ter aplicado anteriormente co fin previsto nesta letra d).

Con carácter excepcional poderase autorizar a inscrición de entidades que non cumpran o requisito de investimento establecido nesta letra d), sempre que o número de postos de traballo para crear e a media anual de cadro de persoal superen o mínimo previsto na letra e) deste parágrafo.

e) A creación de postos de traballo no ámbito xeográfico da Zona Especial Canaria dentro dos seis meses seguintes á súa autorización e o mantemento como mínimo nese número da media anual do cadro de persoal durante o período de desfrute deste réxime, cun mínimo de:

Nas illas de Gran Canaria e Tenerife, cinco empregos.»

Nas illas de El Hierro, Fuerteventura, La Gomera, Lanzarote e La Palma, tres empregos.

Cando se exercese anteriormente a mesma actividade baixo outra titularidade, exixirase unha creación neta de, polo menos:

Nas illas de Gran Canaria e Tenerife, cinco empregos.

Nas illas de El Hierro, Fuerteventura, La Gomera, Lanzarote e La Palma, tres empregos.»

Seis. Con efectos a partir do 1 de xaneiro de 2007, modifícase o punto 1 do artigo 35, que queda redactado como segue:

«1. Adscrita ao Consello Reitor da Zona Especial Canaria créase, como órgano colexiado, unha comisión técnica, cuxa finalidade será a emisión de informes sobre as solicitudes de inscrición no Rexistro Oficial de Entidades da Zona Especial Canaria, logo de comprobación dos requisitos legais e regulamentarios para obter a inscrición, informes que serán vinculantes no relativo aos extremos de solvencia, viabilidade e competitividade internacional, contidos na letra f) do artigo 31.3 desta lei.»

Sete. Con efectos a partir do 1 de xaneiro de 2007, modifícase o artigo 38, que queda redactado como segue:

«Correspóndelle ao Consello Reitor do Consorcio da Zona Especial Canaria:

a) Tramitar e resolver as solicitudes de autorización das entidades que pretendan acollerse ao réxime especial da Zona Especial Canaria, así como autorizar, logo de informe da Comisión Técnica, a inscrición de entidades cando conorra o suposto a que se refire o último parágrafo da letra d) do artigo 31.3 desta lei.

b) Xestionar o Rexistro Oficial de Entidades da Zona Especial Canaria.

c) Xestionar e recadar as taxas reguladas no artigo 50 desta lei.

d) Vixiar o cumprimento por parte das entidades da Zona Especial Canaria do disposto nesta lei, podendo para iso requirir canta información sexa precisa, sen prexuízo das competencias atribuídas a outros órganos ou organismos públicos.

e) Resolver os expedientes sancionadores que se tramiten segundo o disposto nas normas contidas no capítulo VI deste título.

f) Subministrar a información que lle sexa requirida polas administracións ou organismos competentes, de acordo co establecido nesta lei e nas súas normas de desenvolvemento.

g) Elaborar anualmente un anteproxecto de orzamento, coa estrutura que sinale o Ministerio de Economía e Facenda.

h) Ditar as instrucións sobre o funcionamento da Zona Especial Canaria naqueles aspectos en que teña atribuída esta competencia, así como as que exixan o desenvolvemento e a execución das normas contidas na lei, sen prexuízo das competencias doutros órganos, en relación coas cuestións de procedemento relativas ao Rexistro Oficial de Entidades da Zona Especial Canaria.

i) Establecer as súas normas e as dos seus órganos adscritos, en materia de xestión e de funcionamento interno, así como determinar as funcións do secretario e, logo de informe favorable do Ministerio de Economía e Facenda, o réxime económico das asistencias ao Consello Reitor e á Comisión Técnica.

j) Propoñer a remoción dos membros da Comisión Técnica cando, ao seu xuízo, incorresen en incompetencia técnica ou actuasen con infracción das leis.

k) Emitir cantos informes se lle soliciten en relación coas materias da súa competencia.

l) Promover a Zona Especial Canaria.

m) Calquera outra función ou competencia que lle sexa atribuída directamente nesta lei ou nas súas normas de desenvolvemento.»

Oito. Con efectos para os períodos impositivos que se inicien a partir do 1 de xaneiro de 2007, modifícase a letra a) do punto 1 do artigo 42, que queda redactada como segue:

«a) Aplicarán o tipo de gravame especial establecido no artigo seguinte a aquela parte da base imponible que corresponda ás operacións que realicen material e efectivamente no ámbito xeográfico da Zona Especial Canaria.»

Nove. Con efectos para os períodos impositivos que se inicien a partir do 1 de xaneiro de 2007, modifícase o artigo 43, que queda redactado como segue:

«Artigo 43. *Imposto sobre sociedades. Tipo de gravame especial.*

O tipo de gravame especial aplicable será do 4%.»

Dez. Con efectos para os períodos impositivos que se inicien a partir do 1 de xaneiro de 2007, modifícase a regra terceira do artigo 44, que queda redactada como segue:

«Terceira. O tipo de gravame especial aplicaráselle exclusivamente á parte da base imponible que coincida coa menor das seguintes contías:

a) O importe que resulte de aplicarlle á base imponible a porcentaxe determinada na regra anterior.

b) O importe que, en función da creación de emprego e a actividade desenvolva, resulte do cadro seguinte:

Creación neta de emprego	Actividades de servizos Euros	Actividades industriais Euros
Entre 3 e 8 traballadores . . . . .	1.500.000	1.800.000
Máis de 8 e ata 12 traballadores . . . . .	2.000.000	2.400.000
Máis de 12 e ata 20 traballadores . . . . .	3.000.000	3.600.000
Máis de 20 traballadores e ata 50 traballadores . . . . .	8.000.000	9.200.000
Máis de 50 e ata 100 traballadores . . . . .	18.000.000	21.600.000
Máis de 100 traballadores . . . . .	100.000.000	120.000.000

Malia o anterior, aplicaranse os seguintes límites cando se trate das actividades de: comercio por xunto e intermediarios do comercio (excepto de vehículos de motor e motocicletas); axencias de viaxes, maioristas e retallistas de turismo e outras actividades de apoio turístico; actividades informáticas, actividades xurídicas, de contabilidade, tenza de libros, asesoría fiscal, estudos de mercado e realización de enquisas de opinión pública; consulta e

asesoramento sobre dirección e xestión empresarial; xestión de sociedades de carteira e servizos de publicidade e relacións públicas:

Creación neta de emprego	Actividades mencionadas - Euros
Entre 3 e 8 traballadores . . . . .	1.125.000
Máis de 8 e ata 12 traballadores . . . . .	1.500.000
Máis de 12 e ata 20 traballadores . . . . .	2.250.000
Máis de 20 traballadores e ata 50 traballadores . . . . .	6.000.000
Máis de 50 e ata 100 traballadores . . . . .	13.500.000
Máis de 100 traballadores . . . . .	75.000.000

Para estes efectos, enténdese por creación neta de emprego o número de postos de traballo netos creados no ámbito xeográfico da Zona Especial Canaria desde a autorización da entidade da Zona Especial Canaria, excluídas, de ser o caso, as incorporacións dun cadro anterior.

As variacións na creación neta de emprego producirán efecto no exercicio impositivo en que se produzan.»

Once. Con efectos a partir do 1 de xaneiro de 2007, modifícase o artigo 45, que queda redactado como segue:

«Artigo 45. *Exencións na Zona Especial Canaria.*

As exencións previstas nas letras c) e h) do número 1 do artigo 14 do texto refundido da Lei do imposto sobre a renda de non-residentes, aprobado polo Real decreto legislativo 5/2004, do 5 de marzo, aplicaranse así mesmo nos supostos en que as rendas a que se refiren estas letras sexan obtidas, por residentes en Estados non membros da Unión Europea, en condicións e con requisitos iguais ou equivalentes, segundo os casos, aos alí recollidos, cando tales rendas sexan satisfeitas por unha entidade da Zona Especial Canaria, sempre que estas procedan de operacións realizadas material e efectivamente no ámbito xeográfico da Zona Especial Canaria. Para estes efectos, non resultará de aplicación o establecido no último parágrafo da mencionada letra h).

Estas exencións non serán de aplicación cando os rendementos e ganancias patrimoniais sexan obtidos a través de países ou territorios cos cales non exista un efectivo intercambio de información tributaria, de acordo co disposto no número 3 da disposición adicional primeira da Lei 36/2006, do 29 de novembro, de medidas para a prevención da fraude fiscal, nin cando a sociedade matriz teña a súa residencia fiscal nun deses países ou territorios.»

Doce. Con efectos a partir do 1 de xaneiro de 2007, modifícase o punto 3 do artigo 49, que queda redactado como segue:

«3. Non será de aplicación o establecido no artigo 9.2 do texto refundido da Lei reguladora das facendas locais, aprobado polo Real decreto legislativo 2/2004, do 5 de marzo.»

Trece. Con efectos a partir do 1 de xaneiro de 2007, modifícase o artigo 67, que queda redactado como segue:

«Artigo 67. *Sancións.*

1. Sen prexuízo do disposto no artigo 52 desta lei, as infraccións graves sancionaranse con multa

de 300 euros a 30.000 euros e coa perda dos beneficios fiscais establecidos neste título correspondentes ao exercicio en que se cometese a infracción.

Non obstante o disposto no parágrafo anterior, a entidade sancionada poderá solicitar no seguinte exercicio o desfrute dos beneficios fiscais, nos termos que regulamentariamente se establezan, sempre que cumprise todos os requisitos previstos no punto 3 do artigo 31 desta lei. En caso de que a entidade non presente esta solicitude, procederase á cancelación da inscrición da entidade infractora no Rexistro Oficial de Entidades da Zona Especial Canaria.

2. As infraccións leves sancionaranse con multa de 60 euros a 300 euros.

3. A imposición das sancións establecidas nos parágrafos anteriores graduarase atendendo, en cada caso, a propia gravidade da infracción, a natureza dos danos e perdas causados e a reincidencia, por comisión no termo dun ano de máis dunha infracción da mesma natureza, cando así fose declarado por resolución firme.

Catorce. Con efectos a partir do 1 de xaneiro de 2007, engádeselle un punto 4 á disposición adicional décimo primeira, coa seguinte redacción:

«4. O ámbito de aplicación dos sectores citados nos parágrafos anteriores será o establecido na normativa comunitaria sobre axudas estatais.»

**Artigo segundo.** *Modificación do anexo do Real decreto lei 2/2000, do 23 de xuño, polo que se modifica a Lei 19/1994, do 6 de xullo, de modificación do réxime económico e fiscal de Canarias, e outras normas tributarias.*

Con efectos a partir do 1 de xaneiro de 2007, modifícase o anexo do Real decreto lei 2/2000, do 23 de xuño, polo que se modifica a Lei 19/1994, do 6 de xullo, de modificación do réxime económico e fiscal de Canarias, e outras normas tributarias, que queda redactado como segue:

#### «ANEXO

##### Lista de actividades

*Actividades de produción, transformación, manipulación e distribución por xunto de mercadorías*

- Pesca. NACE B.
- Industria da alimentación, bebidas e tabaco. NACE DA.
- Industria da confección e da peletaría. NACE 17.4, 17.5, 17.6, 17 e 18.
- Industria do coiro e calzado. NACE DC.
- Industria do papel, edición, artes gráficas e reprodución de soportes gravados, incluídas na subsección DE da NACE.
- Industria química. NACE 24.
- Prefabricados para a construción. NACE 45.25, 45.3, 45.4, 20.2, 20.3, 25.2, 26.1, 26.2, 26.3, 26.4, 26.7, 24.3, 28.1, 28.2, 28.12, 28.63, 28.7 e 36.1.
- Industria da construción de maquinaria e equipamento mecánico. NACE 29.
- Industria de material e equipamento eléctrico, electrónico e óptico. NACE DL.
- Mantemento aeronáutico. NACE 35.30.
- Fabricación de mobles; outras industrias manufactureras. NACE 36.
- Industria da reciclaxe. NACE 37.
- Comercio por xunto e intermediarios do comercio, incluídas nas divisións 50 e 51 da NACE.
- Xeración de enerxías renovables. NACE 40.10.

*Actividades de servizos*

Transportes e actividades anexas, incluídas na sección I da NACE.

Mantemento e reparación de motores de vehículos aeronáuticos NACE 50.2

Actividades informáticas. NACE 72.

Servizos relacionados coa explotación de recursos naturais e eliminación de residuos. NACE n.c.

Servizos relacionados coa investigación e o desenvolvemento. NACE 73.

Outras actividades empresariais. NACE 74.

Servizos de formación especializada e posgrao. NACE 80.3 e 80.4.

Produción cinematográfica e de vídeo. NACE 92.11.

Produción de programas de radio e televisión, con exclusión da difusión posterior dos ditos programas, incluídas na clase 92.20 da NACE.

Os centros de coordinación e servizos intragrupo atópanse excluídos das actividades de servizos comprendidas no grupo 74.15 da NACE («Outras actividades empresariais»).»

**Disposición adicional primeira.** *Non-aplicación dos beneficios fiscais cando concorran axudas de Estado ilegais e incompatibles.*

Non poderán desfrutar dos beneficios fiscais regulados na Lei 19/1994 que constitúan axudas estatais segundo o ordenamento comunitario os que percibisen axudas de Estado declaradas ilegais e incompatibles co mercado común ata que non se producise o reembolso correspondente de tales axudas.

**Disposición adicional segunda.** *Control das axudas estatais.*

A Administración tributaria deberá atender as solicitudes de información que sexan requiridas pola Comisión Europea en relación coa aplicación dos réximes fiscais regulados na Lei 19/1994 que constitúan axudas estatais segundo o ordenamento comunitario. Para estes efectos, a Administración tributaria poderá utilizar a información de que dispoña en relación con quen desfrutase das axudas de Estado previstas na dita lei e remitiralle á Intervención Xeral da Administración do Estado a información necesaria sobre as axudas de Estado derivadas da aplicación da citada lei, para a súa incorporación á Base de Datos Nacional de Subvencións regulada no artigo 20 da Lei 38/2003, do 17 de novembro, xeral de subvencións.

A aplicación conxunta ou separada dos beneficios fiscais regulados no artigo 26 e no número 4 do artigo 27, letra C, e números 2.º a 6.º da letra D, así como, se for o caso, no número 1.º desta letra D, da Lei 19/1994, non poderá exceder dos límites establecidos polo ordenamento comunitario. Así mesmo, a aplicación conxunta dos beneficios fiscais regulados no título V da Lei 19/1994 tampouco poderá superar tales límites.

**Disposición adicional terceira.** *Axudas a grandes proxectos de investimento.*

A aplicación dos beneficios fiscais regulados na Lei 19/1994 axustarase, cando así proceda, ás condicións especiais recollidas nas directrices comunitarias sobre as axudas de Estado de finalidade rexional para o período 2007-2013, respecto dos grandes proxectos de investimento.

Regulamentariamente estableceranse os termos e os límites da dita aplicación.

**Disposición adicional cuarta.** *Axudas estatais ao sector agrario e forestal.*

A aplicación dos beneficios fiscais establecidos nos artigos 25, 26 e 27 e na sección 2.ª do capítulo III do título V da Lei 19/1994, por parte das empresas que leven a cabo actividades de produción, transformación ou comercialización de produtos agrícolas comprendidos no anexo I do Tratado da Comunidade Europea, quedará condicionada ao disposto nas directrices comunitarias sobre axudas estatais ao sector agrario e forestal 2007-2013, tendo en conta as especialidades que deriven da condición ultraperiférica da Comunidade Autónoma de Canarias.

Regulamentariamente estableceranse os termos e os límites desta aplicación.

**Disposición adicional quinta.** *Axudas estatais no sector da pesca e a acuicultura.*

A aplicación dos beneficios fiscais establecidos nos artigos 25, 26 e 27 e na sección 2.ª do capítulo III do título V da Lei 19/1994, por parte das empresas que leven a cabo actividades de produción, transformación ou comercialización de produtos da pesca e a acuicultura, quedará condicionada ao disposto nas directrices comunitarias para o exame das axudas estatais no sector da pesca e a acuicultura, tendo en conta as especialidades que deriven da condición ultraperiférica da Comunidade Autónoma de Canarias.

Regulamentariamente estableceranse os termos e os límites desta aplicación.

**Disposición adicional sexta.** *Axudas ao sector do transporte.*

Regulamentariamente establecerase a adecuación dos beneficios fiscais establecidos nos artigos 25, 26 e 27 e na sección 2.ª do capítulo III do título V da Lei 19/1994, naqueles aspectos particulares non regulados neles, ás normas comunitarias sobre axudas ao sector do transporte, tendo en conta as especialidades que deriven da condición ultraperiférica da Comunidade Autónoma de Canarias.

**Disposición transitoria primeira.** *Incentivos ao investimento.*

1. A efectividade da exención no imposto sobre transmisións patrimoniais e actos xurídicos documentados regulada no artigo 25 da Lei 19/1994, para as operacións de constitución de sociedades ou ampliación de capital xeradas no prazo dun mes antes da entrada en vigor deste real decreto lei e cuxas achegas en diñeiro non fosen destinadas á adquisición ou importación de bens de investimento no momento da entrada en vigor deste real decreto lei, está condicionada a que tales fondos se destinen á adquisición ou importación dos bens de investimento e os elementos do inmovilizado inmaterial nas condicións establecidas na nova redacción dada por este real decreto lei aos números 3 e 4 do artigo 25 da Lei 19/1994.

2. O establecido no número 8 do artigo 25 da Lei 19/1994 resulta aplicable ás cotas liquidadas do imposto xeral indirecto canario como consecuencia de procedementos de verificación de datos, comprobación limitada ou de inspección, cuxa comunicación de inicio se notifique ou se entenda notificada con posterioridade á entrada en vigor deste real decreto lei.

**Disposición transitoria segunda.** *Reserva para investimentos en Canarias.*

1. As dotacións á reserva para investimentos procedentes de beneficios de períodos impositivos iniciados

antes do 1 de xaneiro de 2007 regularanse polas disposicións establecidas no artigo 27 da Lei 19/1994, segundo a súa redacción vixente o 31 de decembro de 2006.

2. Os investimentos anticipados realizados nun período impositivo iniciado antes do 1 de xaneiro de 2007 consideraranse materialización da reserva para investimentos de beneficios obtidos noutro período impositivo posterior iniciado, igualmente antes desta data, e regularanse polas disposicións establecidas no artigo 27 da Lei 19/1994, segundo a súa redacción vixente o 31 de decembro de 2006.

**Disposición transitoria terceira.** *Zona Especial Canaria.*

As entidades que obtiveran autorización para a inscrición no Rexistro Oficial de Entidades da Zona Especial Canaria con anterioridade ao 31 de decembro de 2006 rexeranse ata o 31 de decembro de 2008 polas disposicións da Lei 19/1994, segundo a súa redacción vixente o 31 de decembro de 2006.

**Disposición derogatoria única.** *Zona Especial Canaria.*

A partir da entrada en vigor deste real decreto lei queda derogado o capítulo IV do título V da Lei 19/1994.

**Disposición derradeira primeira.** *Habilitación normativa.*

O Goberno ditará cantas disposicións sexan necesarias para o desenvolvemento e a aplicación do establecido neste real decreto lei.

**Disposición derradeira segunda.** *Entrada en vigor.*

Este real decreto lei entrará en vigor o día seguinte ao da súa publicación no «Boletín Oficial del Estado».

Dado en Madrid o 29 de decembro de 2006.

JUAN CARLOS R.

O presidente do Goberno,  
JOSÉ LUIS RODRÍGUEZ ZAPATERO

**22953** *REAL DECRETO LEI 13/2006, do 29 de decembro, polo que se establecen medidas urxentes en relación co programa PREVER para a modernización do parque de vehículos automóbiles, o incremento da seguridade viaria e a defensa e protección do ambiente. («BOE» 312, do 30-12-2006.)*

En virtude do Real decreto lei 6/1997, do 9 de abril, e, meses despois, da Lei 39/1997, do 8 de outubro, aprobouse o programa PREVER para a modernización do parque de vehículos automóbiles, o incremento da seguridade viaria e a defensa e protección do ambiente. Este programa baséase en beneficios fiscais, segundo o caso, no imposto especial sobre determinados medios de transporte (IEDMT) o no imposto persoal do vendedor (imposto sobre sociedades ou imposto sobre a renda das persoas físicas) que se aplican con ocasión da adquisición de vehículos de turismo e de vehículos industriais lixeiros, novos ou usados, sempre que se dea de baixa para desmantelamento un vehículo equivalente dunha antigüidade determinada.

Desde a súa posta en marcha, as matriculacións e adquisicións de vehículos que se acolleron ao programa

PREVER foron numerosas e, desde esa perspectiva, débese sinalar que o programa cumpriu os seus obxectivos. Non obstante, superado o seu impacto inicial, a permanencia estrutural de tales beneficios fiscais vailles restando eficacia incentivadora xa que, na medida en que a súa existencia se dá por descontada, reducen aínda máis o seu xa limitado efecto sobre a decisión dos compradores de adquirir un vehículo.

Por esta razón, aínda que o programa PREVER naceu inicialmente cunha vixencia indefinida, xa a Lei 14/2000, do 29 de decembro, de medidas fiscais, administrativas e da orde social, estableceu que este programa finalizaría o día 1 de xaneiro de 2004, aínda que esta data de finalización foi trasladada despois ao día 1 de xaneiro de 2007 pola Lei 62/2003, do 30 de decembro, de medidas fiscais, administrativas e da orde social.

A previsión de que nun futuro próximo se leve a cabo unha reestruturación, desde a perspectiva ambiental, da fiscalidade que incide sobre os medios de transporte, aconsella, en termos xerais, manter durante 2007 a vixencia do programa PREVER mentres se definen os criterios da dita reestruturación. Non obstante, resulta aconsellable reducir desde o 1 de xaneiro de 2007 o contido deste programa nos termos que se indican a continuación.

De acordo co exposto, fíxase no día 1 de xaneiro de 2008 a data da desaparición definitiva do programa PREVER. Non obstante, este programa deixará xa de aplicarse a partir do día 1 de xaneiro de 2007 aos turismos novos de cilindrada igual ou superior a 2.500 cc e aos vehículos usados. Tamén se deixará de aplicar a partir do día 1 de xaneiro de 2007 a dedución extraordinaria suplementaria coñecida como «Programa PREVER-gasolina», nacida no seu momento como unha medida de apoio específico á renovación de vehículos que só podían utilizar gasolina con chumbo como carburante, e cuxo mantemento hoxe en día carece de xustificación.

Por último, en canto á necesidade de recorrer á figura xurídica do real decreto lei, débese destacar que, por unha parte, as medidas tributarias que se adoptan están sometidas ao principio de reserva de lei. Por outra parte, unha tramitación parlamentaria ordinaria non permite, no momento actual, que esta medida entre en vigor antes do día 1 de xaneiro de 2007, o que suporía unha discontinuidade non desexable no tratamento fiscal dos vehículos afectados que sería contraria, ademais, aos obxectivos pretendidos sinalados máis arriba. Por outra parte, o prolongado período de tempo derivado dunha tramitación parlamentaria ordinaria que discorre entre o coñecemento público da medida e a súa entrada en vigor podería distorsionar decisións de compra dos medios de transporte afectados e, na mesma medida, afectar negativamente o mercado.

Na súa virtude, facendo uso da autorización contida no artigo 86.1 da Constitución española, por proposta do vicepresidente segundo do Goberno e ministro de Economía e Facenda, logo de deliberación do Consello de Ministros na súa reunión do día 29 de decembro de 2006,

DISPONGO:

**Artigo 1.** *Modificación da Lei 38/1992, do 28 de decembro, de impostos especiais.*

Con efectos a partir da entrada en vigor deste real decreto lei, modifícase o artigo 70 bis da Lei 38/1992, do 28 de decembro, de impostos especiais, que quedará redactado como segue:

«Artigo 70 bis. *Dedución da cota.*

1. Os suxeitos pasivos que sexan titulares dun vehículo automóbil de turismo usado, que cumpra